

來鳳縣志卷十一

典禮志

慶賀 迎春附

大清會典順治間定凡元旦冬至

萬壽節在外直省文武大小各官但設龍亭香案朝服望

闕行三跪九叩首禮康熙二十二年題准直省行慶賀禮

是後定制每歲恭遇

慶典及元旦冬至三大節文武官五鼓齊集

萬壽宮分班行禮恭遇

來鳳縣志

卷之十一

典禮志

慶賀

一

恩詔所至地方官員具龍亭彩輿儀仗鼓樂出郭迎接卽安
奉

萬壽宮內行禮宣讀朔日宣講

上諭亦卽於此各州縣未建

萬壽宮者皆於明倫堂行禮

迎春附

通禮先立春日府縣於東郊造芒神土牛立春在十二月望後芒神執策當牛肩在正月朔後當牛腹在正月望後當牛膝示民農事早晚

儀注屆立春日吏設案於芒神春牛前陳香燭菓酒之屬案前布拜席通贊執事者於席左右立府縣正官率在城文武官丞史以下朝服畢詣東郊立春時至通贊贊行禮正官一人在前餘以序列行就拜位贊跪叩興衆行一跪三叩禮執事者舉壺爵跪於正官之左正官受爵酌酒酌酒三授爵於執事者復行三叩禮衆隨行禮興迺昇芒神土牛鼓樂前導各官後從迎入城置於公所各官執采杖環立樂工擊鼓擊土牛三迺各退

按迎春禁例康熙十二年覆准嗣後直省府州縣各

官拜迎芒神土牛止用鼓吹綵亭其勒令鹽商當舖行戶粧扮故事臺閣排列金珠張鼓樂樹旗幟併科派里長捉取馬匹車輛伶人娼婦等項嚴行禁止如有前項糜費並各官借端派累該督撫科道題叅交與該部議處

鄉飲

通禮歲孟春望日孟冬朔日舉行鄉飲酒之禮於學宮府以守縣以令爲主人以鄉之年高六十以上有德行者一人爲賓其次一人爲介又其次爲衆賓以教官一

人爲司正學弟子習禮者二人司爵二人贊禮二人引禮一人讀律令僚佐皆與前期戒賓賓禮辭許戒介亦如之右戒先一日司正率執事者詣講堂肄儀設監禮

席次於庭東北面布賓席於堂西北南向主人席於堂東南南向介席於堂西南東向衆賓之長三人席於賓西南向東上皆專席不屬衆賓席於西序東向僚佐席於東序西向皆北上司正席於主人之東北向如夫有鄉

觀禮者坐於東北三品以上席設律令案一於主介間

正中東西肆設尊案一於東序端南北肆設樂於西階

來鳳縣志

卷之十一

典禮志

慶賀

三

下如儀

右陳設
布席

儀注屆日質明執事者入具饌設尊於案實酒於尊加羃勺觶爵在尊北讀律令者奉律令陳於中案監禮者朝服詣學宮主人率司正及僚屬咸朝服入乃使人速賓介屆時賓介盛服至序立於庠門外之右介居賓南衆賓居介南皆東面北上執事以賓至告於主人主人出迎賓西面揖賓介以下東面答揖主人入門左賓揖介介揖衆賓以次入門右當階主人揖及階揖賓皆答揖主人與賓讓升三讓賓三辭主人升賓廼升主人東

階上賓西階上贊者贊拜主人西面再拜賓東面答拜興卽席主人降延介一讓升介升拜如賓禮就位主人迺延衆賓衆賓以次皆升主人揖賓長皆答揖衆賓卽席主人率僚佐以下皆卽席右迎賓贊者贊揚觶執事者引司正由東階升詣堂中賓介皆起立贊揖司正揖賓介以下答揖司爵詣酒尊所舉冪酌酒於觶進授司正司正揚觶而語曰恭惟

朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序兄弟恭內

來鳳縣志

卷之十一

典禮志

慶賀

四

睦宗族外和鄉黨無或廢墜以忝厥生讀畢贊者贊司正飲酒司正立飲畢以觶授執事者反於案贊揖司正揖賓介以下皆揖司正復位賓介以下皆坐右揚觶贊讀

律令執事者舉律令案於中堂引禮引讀律令者就案前北面立賓介主人以下聽贊咸起立旅揖如司正揚觶禮迺讀律令曰律令凡鄉飲酒序長幼論賢良高年有德者居上其次序齒列坐有過犯者不得干與違者罪以違制失儀則揚觶者以禮責之讀畢復位賓介以下皆坐右讀律令贊者贊供饌執事者舉饌案於賓前次介

次主人衆賓以下徧舉訖贊賓主人起離席北面立司爵詣酒尊所酌酒實爵授主人主人受爵詣賓席奠於案稍退賓避席立於主人之左贊拜主人再拜賓答拜皆復位立贊賓酢主人賓離席司爵酌酒授賓賓受爵介從詣主人席前拜送爵主人答拜如前儀復位主人起獻介介酢主人如前儀皆坐執事者徧獻三賓衆賓爵訖右獻賓賓酒數行工升歌周詩鹿鳴三章卒歌笙奏

御製補南陔白華華黍詩間歌周詩魚麗南有嘉魚南山有

來鳳縣志

卷之十一

典禮志

鄉飲

五

臺三章笙奏

御製補由庚崇邱由儀詩迺合樂歌周南關雎三章召南鵲

巢三章卒歌工告備出執事者行酒主賓以下飲無算

爵右樂賓

贊者贊徹饌衆起離席主人率僚屬在東西上

賓介在西東上皆北面贊拜主人再拜賓介以下皆再拜賓降西階出介及衆賓從立庠門外之右東面北上主人降東階出僚屬從送賓於庠門外之左西面旅揖賓介退禮卒無愆監禮者出主人率僚屬送於庠門外皆退右徹饌

賓出

御製補南陔詩

我逝南陔言陟其岵昔我行役瞻望有父欲養無由風
木何補
我逝南陔言陟其屺今我行役瞻望有母母也倚閭歸
則寧止
南陔有筍籜實勺之孱孱孫提孰噢咻之慎爾溫清潔
爾旨餽今爾不養日月其慆

御製補白華詩

有白者華不污纖塵咨爾士兮宣修其身不修其身乃
來鳳縣志

卷之十一

典禮志

鄉飲

六

貽羞於二人

有白者華婉茲靜好咨爾女兮宣修婦道不修婦道乃
貽羞於二老

白華匪玉涅而不淄白華匪蘭芬乃勝之我擷白華載
詠載思

白華匪玉質玉之令白華匪蘭臭蘭之淨我擷白華載
思載詠

御製補華黍詩

瞻彼阪田厥黍始華胝足胼手嗟我農夫

瞻彼阪田黍華以秀胼手胝足惟勤斯茂
華有不秀矣秀有不實矣其雨其雨矣杲杲日出矣愁
予愁之恤矣

御製補由庚詩

王庚便便東西朔南六符調燮八風節宣
王庚容容朔南西東維敬維勤百王道同
王庚廓廓東西南朔先憂而憂後樂而樂
王庚恢恢南朔東西皇極孰建惟德之依

御製補崇邱詩

來鳳縣志

卷之十一

典禮志

鄉飲

七

澗松童童蛙黽鄰兮邱草萋萋蕩青雲兮凡百君子慎
迺託身兮
澗松童童澗則卑兮邱草萋萋邱則崎兮凡百君子慎
迺所依兮
有崇者邱物無不遂有卓者道愚無不智資生育德永
植勿替

御製補由儀詩

在上曰天在下曰地君君臣臣父父子子
在下曰地在上曰天父父子子君君臣臣

由其儀矣物則熙矣儀則由矣物則休矣

救護

通禮府縣遇日月食各按欽天監推定時刻分秒隨時救護各於公署均以正官一人領班行禮正貳教職二人糾儀學弟子員二人通贊二人引班陰陽官一人報時至日設香案於露臺上爐檠具早晚隨日月爲向糾儀通贊引班分列於香案左右布各官拜席於香案陳金鼓於儀門外樂舞生二人奉小鼓於露臺下各官素服陰陽官報日月初虧通贊贊齊班引班引各官至拜來鳳縣志

卷之十一 典禮志 救護 八

位前立重行異等少進贊跪叩興衆行三跪九叩禮興贊上香班首官進至香案前三上香畢復位贊跪皆跪贊伐鼓樂舞生奉鼓進跪於左正官伐鼓三聲儀門外金鼓振作乃按班更番上香祇跪糾儀二人更番祇立並如前儀陰陽官報日月復圓金鼓聲止通贊贊齊班衆官至拜位前立聽贊行禮如初畢各退